

四庫全書

集部

欽定四庫全書

集部

楊仲弘集卷一至五

詳校官庶吉士臣初魯齡

侍讀臣孫球覆勘

覆校官中書臣方大川

校對官中書臣吳甸華

謄錄監生臣沈浩

欽定四庫全書

集部五

楊仲宏集

別集類四 元

提要

臣等謹案楊仲宏集八卷元楊載撰載字仲宏浦城人後徙杭州初以布衣薦授翰林國史院編修官調海船萬戶府照磨會仁宗復行科舉之制遂登延祐二年進士授饒州路同知浮梁州事終于寧國路總管府推官事

蹟具元史儒學傳焦竑國史經籍志載楊載  
仲宏集四卷此本八卷不知何人所分元代  
詩人世推虞楊范揭史稱其文章一以氣為  
主而于詩尤有法度自其詩出一洗宋季之  
陋云云蓋宋代詩派凡數變西崑傷于雕琢  
一變而為元祐之朴雅元祐傷于平易一變  
而為江西之生新南渡以後江西宗派盛極  
而衰江湖諸人欲變之而力不勝于是仄徑

旁行相率而為瑣屑寒陋宋詩于是掃地矣  
載生于詩道弊壞之後窮極而變乃復其始  
風規雅贍雍雍有元祐之遺音史之所稱固  
非溢美故清思不及范曄秀韻不及揭傒斯  
權奇飛動尤不及虞集而四家並稱終無忤  
色蓋以此也都穆南濠詩話曰楊益載詩律  
精切其追和李義山無題五首詞意兼到真  
義山之勑敵瞿宗吉歸田詩話曰楊仲宏以

宗陽宮翫月詩得名然他作如風雨五更雞  
亂叫江湖千里雁相呼挾書萬里朝明主仗  
劍三年別故鄉窓間夜雨銷銀燭城上春雲  
壓綵旗空桑說法黃龍聽貝葉繙經白馬馱  
沉雄典實先叔祖每稱之長篇如古牆行梅  
梁歌亦皆為時所稱夫人瞿氏余祖姑也嘗  
以仲宏親筆草稿數紙授予字畫端謹而前  
後點竄幾盡蓋不苟作如是則載于是事亦

以苦吟得之者矣陶宗儀輟耕錄曰虞伯生  
先生楊仲宏先生同在京日楊先生每言伯  
生不能作詩虞先生載酒請問作詩之法楊  
先生酒既酣盡為傾倒虞先生遂超悟其理  
云云竟謂載詩在虞集上則非其實也乾隆  
四十二年五月恭校上

總纂官臣紀昀臣陸錫熊臣孫士毅

總校官臣陸費墀





楊仲弘集原序

大德間余始得浦城楊君仲弘詩讀之恨不識其為人  
及至京師與余定交商論雅道則未嘗不與挺掌而說  
也皇慶初仲弘與余同為史官會時有纂述事每同舍  
下直已而猶相與回翔畱署或至見月月盡繼燭相語  
刻苦澹泊寒暑不易者唯余一二人耳故其後余以御  
史府用筦南憲架閣適海上仲弘復登乙卯進士第為  
浮梁別駕余遷江西仲弘亦改宣城理官相達十數年

相距數千里迹雖如是而心固猶數晨夕也而仲弘竟未任宣城以卒烏乎慟哉余嘗觀於風騷以降漢魏下至六朝弊矣唐初陳子昂輩乘一時元氣之會卓然起而振之開元大厯之音由是不變至晚宋又極矣今天下同文而治平盛大之音稱者絕少於斯際也方有望於仲弘也天又不年假之豈非命耶蓋仲弘之天稟曠達氣象宏朗開口論議直視千古每大衆廣席占紙命辭教睨橫放盡意所止衆方拘拘已獨坦坦衆方紆餘

已獨馳駿馬之長坂而無畱行故當時好之者雖多而  
知之者絕少要一代之傑作也仲弘有子尚幼其殘藁  
流落未有能為輯次者友人杜君伯原自武夷命僕曰  
將就其平生所得詩刻諸山中此誠知仲弘者而杜君  
猥謂螯仲弘海內之交相好又莫余若也俾為序之用  
掇其梗槩著于篇端致和元年六月一日臨江范梈序

欽定四庫全書

序

欽定四庫全書

楊仲弘集卷一

元 楊載 撰

雪軒

北風海上來大雪何壯哉上下九萬里洗淨無纖埃君  
家十二樓軒窗洞然開吹笙擊鳴鼓呼賓與銜盃名言  
落四座大笑聲如雷舉頭望長空高興驚冥鴻仙人五  
六輩飛下白雲中粲粲明珠袍相從萬玉童問君何所  
事未就丹鼎功翩然却攜手共入蓬萊宮

次方韶父遊九鎖山韻

平生一枝筇畏踏市朝路出門見青山如鶻追狡兔茲  
晨正炎暑赤日那肯算振衣得冷風超若忘世故冥冥  
九鎖雲未睹心已慕想當挾良朋盡取奇絕處曠哉天  
壤間寓物豈為痼歸來思舊丘我服寧改素無官正爾  
佳有子亦堪據誰歟事虛名白首不知誤

桶底圖

巨鼇奮其首戴山出海中神人擇所處共構金銀宮凭

高開戶牖屈曲互相通  
女仙七十二顏色如花紅  
一一執樂器奏曲殊未終  
世傳桃源圖共徵彭澤翁  
此本出異士雕刻尤精工  
天地極廣大為地當不同  
我願學仙道積久乃有功  
鍊形去滓穢五色浮虛空  
一朝乘風去浩然入無窮

次景遠學士立春日韻

四首

大雪入歲算其兆為有年  
漉漉始彌旬父老怨苦寒  
平旦上馬去重裘忽如單  
況彼牛衣子束縕噓微煙  
賴有

固窮節猶念及古先

又

古來有道士聲利不置懷顧於草木微而愛松若梅茲  
辰閱庭戶適逢數花開芳意未渠央是足銜吾盃

又

人事重名實趨向盡百端丈夫負雄氣動欲追古賢於  
意少不愜自放江海邊登高望八極雲氣生我前萬事  
何足問所須惟酒錢



又

崎嶇既山曲迢遞亦水濱既見蓬葦士輒復忘為勤得  
之眉睫間我遇固已神所善但棲護豈暇從若人

送淳安徐教諭之任

握手出南城眷眷從此辭蒼茫寒江色日莫浮雲滋大  
舟挾雙舫輕若四馬馳淳安衆才彥竝遲得師資擊鼓  
會高堂帷帳春風吹執經列座下質問無留疑平生五  
車書少出胸中奇歛然聽佳譽庶用懌我思

贈李尊師

李君神人也冥晦居山中還丹九轉成顏色如兒童致  
虛感元氣語默與天通頻歲傷水旱下民食不充曰雨  
須有雨曰風必有風上帝聞其賢行世多陰功策名紫  
虛府進位稱仙公騎龍上天去此樂無終窮

太古雪為楊友宜賦

往時天大風能吹華山裂墜此一卷石或云太古雪粵  
自開闢初雲氣所凝結已經六萬歲變化同截業望之

色正白表裏共澄澈塵土不能浣光采耀日月願君勿  
愛此持以獻金闕回中避暑時持用消毒熱

胡氏刺虎圖

究有烈婦人胡姓嫁劉氏從夫棗陽戍車宿水之溼夜  
半猛虎至銜夫入菑翳夫人自驚起不暇生為計直前  
執虎足盡力與牽制呼兒抽佩刀刃刺虎立斃夫命復  
不救復讐古所貴嗚呼流俗弊人義日以廢婦不失其  
夫臣子競為利患難圖苟免聞此得無媿吾故作此詩

于以告萬世

溪山積雪圖

大雪歸溪山長林晝冥窗棧橋跨絕岸遠望行客少買  
魚酤新酒獨酌竟昏曉似此非他人高士戴安道

偕虞伯生魏雄卿魏池燕集分韻得閣字

侯家有貴客置酒燕池閣溽暑方盛極風雨俄大作移  
楊相簸蕩蒲荷紛偃薄亂叫失蛙黽回翔迷鸛鶴街流  
汙穢盡竇湧波濤惡喧聲劇降殺神氣欣洗濯趣歡爭

酬酢獻笑雜歌詠益弛劔佩嚴未厭觥籌錯調燮維理  
得滌漉宜施博和澤布原野溼烟散城郭嘉蔬已菁菁  
良苗常濯濯吾徒家食餘豫有豐稔樂

題溫日觀墨葡萄

日觀作葡萄電掃無踪跡誰於故紙上點綴辨墨筆西  
天十萬里來往僅瞬息敗闕固不小遺下履一隻

題金壇宋氏自怡軒

白雲生何許萌芽自山石厥初僅毫末須臾大充斥蔓

延塞虛空日月為昏匿或時為霖雨庶類蒙潤澤或隨  
飄風散起滅竟無迹相緣千萬變發色黑青赤畸人飭  
棟宇遠俗喜幽閒開軒納高曠撫翫自怡懌人情慕富  
貴驅逐不暫息轉盼失故常在已何所得上下數千載  
往事猶歷歷於焉服聖訓無用苦沉溺昔年陶隱居常  
作帝王客挂冠神武門作詩寫胸臆超然處物外可謂  
貞且白何以企若人鞠躬修道德

礪松為丁師善作

礧松高百尺磊落多大節連根抱危石古色黑如鐵隆  
冬方沍寒山中積霜雪蘿薦悉枯老蒼崖猶凍裂此時  
唯老幹峭直不摧折國匠求美材瞻望歎奇絕險阻不  
可致既作復中輟我願驅六丁操斧隳崑嶷得此棟梁  
材持以獻天闕

劉將軍詩

交趾小蠻夷去國將萬里土產無異物其人狀如鬼溼  
熱生瘴氣疾者無不死天兵雖南征棄之良有以往年

鄂州省綏靖失其理交馳赤白囊來告犯邊鄙遣人覘  
虛實在廷孰可使矯矯劉將軍一旦備行李有才兼文  
武不但善弧矢深入險惡地限敵纔一水介者數百人  
視之若螻蟻移文至其國詰問事終始指摘中利害文  
辭更深美報書禮甚恭敵邑何敢爾彊吏爭怨隙構煽  
乃為此賄賂却勿受足以振綱紀威聲聞遠方一邊禍  
為弭國家方全盛武備不可弛如此將帥才宜歌宿衛  
士



古木詩

大木生何許乃在泰山隈泰山崖石裂怒木響如雷浸  
潤長膏液根株日以培縱歷千百載霜雪不能摧長安  
天子詔欲築九層臺臺上構宮殿青雲共徘徊匠氏走  
海內博求棟梁材萬夫治道路揮斧重林開大器當大  
用小器易剪裁有如豪侈士蹤跡困塵埃適可厚自養  
毋為興歎哀

東山詩為葉子實賦

東山高幾許上有浮空雲葉君居其間好道夙所聞窮  
年絕人事矻坐攷遺文松關晝常掩石田朝自芸蓀真  
去汨昏養息襲氤氲軒冕有遺策高舉謝世紛悠悠阻  
林莽長與麋鹿羣絲來巢許臣不事堯舜君

題恒齋

精金有恒質入火受百鍊君子有恒性寧逐外物變既  
不慕富貴又不厭貧賤素履往無咎夷險隨所踐張侯  
老世故此義頗深見勉之復勉之繼之在無倦

次仲實見寄韻

平居憶故舊懷抱輒不佳興來望浮雲悵恨獨舉盃奇  
文孰能賞高言孰能偕茲辰辱使至喜有意問來諷誦  
劇傾倒百過卷且開得知賢者心出處與作排山嶽縱  
可移厥高固崔嵬敝廬邇喧市卑溼苦病骸常念川路  
脩杖屨安得陪撫事意疎散毋論與俗乖猶恐戰不勝  
常處澗谷隈斯言弗果踐臨風重徘徊

題文丞相書梅堂

大厦就傾覆難以一木支惟公抱忠義挺然出天姿死  
既得所處自顧乃不疑惻愴大江南名與日月垂我行  
見遺墨再拜墮涕洟名堂有深意亦唯歲寒枝可知平  
昔心慷慨非一時我我著棟宇昭昭示民知勿使風雨  
敗永慰千古思

塞上曲

沙塞何窅窅樹短百草長大河屈曲流不復辨四方驅  
車日將夕黑雲隱長岡人馬俱飢疲解鞍飲寒塘張坐

逐平地擊火燒烏羊桐酪過醇酎搖艷盈盃觴既醉謔  
嗚嗚頓跼如驚狂月從天外來耿耿流素光悲風動寥  
廓拂面吹胡霜白鴈中夜飛參差自成行一箭落霜羽  
挾弓負豪彊中情無留滯千載能鷹揚

邑中南峰陳翁義莊

骨肉分枝葉由來同一身榮枯不相待此富或彼貧君  
子尚周急況復在親親昧茲損益理有覲獨何人南峰  
自善士義勇超常倫焦心視末俗變化何由淳孰利佳

田園壑舟固有神割之惠宗族為世成吾仁仰止文正  
公遺法實所循垂名倘不朽當與斯人均

偶題

叢生園中草蔚蔚媚幽姿乘時各敷榮皓色被綠枝似  
有微香發秋風輒吹之入人襟袖中亦復可憐茲詰朝  
步荒畦莖葉稍離披飄零即已矣霜露不爾私榮悴既  
有時小大何異而幸愛七尺軀天道不可誣

夢讀退之詩頗奇詭已覺記其大旨作此篇

自聞蓬萊山大林夾長巒上生癭藤蘿下生荆榛菅仰  
不見天日藏蓄霧雨寒仙聖常所處沮洳亦少乾雖云  
誇鳳凰出入傷羽翰哀音起空洞令人鼻準酸我欲訴  
上帝為施鐵鑿鑽琢落石側裂化為千丈磐瓊樓與玉  
殿玲瓏相通寬日月交戶牖光射青琅玕而我從吾師  
來遊樂且般呼吸養元氣華腴生肺肝萬劫永不死如  
循環無端竊為仙聖慮炳然心若丹上帝如許我致此  
亦何難

雪後次鄭集之韻

雪後登高望江山信奇哉重岡起且伏相連白皚皚水  
官方謝事雲氣霽然開六龍翻滄海赤日從中來萬物  
將蠢動忽如登春臺木行味正酸含蕊先屬梅天時亦  
相應初昏占斗魁遨遊自茲始入林踐蒼苔西湖青淥  
澗西山高崔嵬長松更千載老枝多折摧名僧初精舍  
靜謐依巖隈伊予實放士正可誅蒿萊情深惟痛飲毋  
吝發新醅家人欲求我但見白雲堆機心無自作可使



絕嫌猜君辭如泉酒我醉如山顏卜居同里巷時時得  
追陪為瓶或先罄此恥當及壘大雅歌治世其音不宜  
哀有倡必有和愧我非長才美哉春雪篇雲漢共昭回

次劉師魯韻

三年客塞上日夜懷舊丘飢來迫我去何暇為遠謀四  
顧無一親此身如羈囚悲風動沙漠回首令人愁道路  
已漫漫歲月復悠悠丈夫四方志至此何所求買船發  
河上河水亦南流攜鉏理荒圃吾疾日已瘳飛雁至江

潞北風天始涼是時禾黍登斯人亦少康皇天降厚德  
胡為私一方燕趙及齊魯人飢或相戕奈何有積廩如  
陵復如罔生非肉食者此憂心甚長亟謀樹臬壤剪茅  
覆小堂我志亦易豐歲祀有特羊

夏夜偕田郎中宿張子元家田君有詩用韻

長日氣甚昏欲睡不可忍薄葺更飲酒趣取太白引坐  
久輒醒然累語加況矧高情逸世表遂使名迹泯彼人  
較是非達者但微哂交遊半天下公輩獨英敏

橘中篇

竝海無山林莽莽皆平疇君家擇地利即此營菟裘  
樹作藩屏青紅間綢繆其中植橘柚擁蔽枝葉稠盛夏  
開白華朱實懸高秋飛霜虐萬物寒風助颼颼凌晨察  
變候策杖巡維陬是何黃金多暴露宜藏收採摘資衆  
力轉輸及佗州不長傳貸殖謂此同列侯上充國家賦  
下貽筐筥謀千縑可坐致何必龍陽洲

次袁伯長韻

盤盤海底石竝樹青琅玕至陽生至陰龍宮常苦寒揚  
光炫朝彩吐氣蒸微瀾根株歷千載莫測勞悴端端如  
巢居子草木皮衣冠超然去人羣取友蹄與翰日誦黃  
帝言浩歎淚闌干奈何天下治必以雲為官佩劍黃金  
環咀丹白玉盤自聞至人德積熱生肺肝黃塵日算起  
對面不相看三山在何處使我師王韓聊歌紫芝曲倚  
君清夜彈

題屏風畫商山四老人

飛雪灑遙野衝波蕩無垠蟠蟠山谷間居此四老人下  
為民庶師上作王家賓清風眇何許馳想寂寞濱

李御史之陝

秦中古帝都遺俗五方并君為監御史出治周百城上  
當采民風下當宣德明赫赫英威振奸惡皆振驚弭節  
事觀覽慷慨有高情宅土稱上腴后稷此躬耕秔稌既  
充實烝民日已生我行由天下留滯客燕京岷然岐山  
嶺嘗致鳳凰鳴駢駢不可追矯首望去旌贈詩聊自寫

寸心西向傾

遣興偶作

春蔬茂前畦  
蒨蒨有顏色  
珍禽叫深樹  
過耳亦一適用  
是易吾慮毋  
為自襲積  
放浪天地間  
無今亦無昔  
古人得意處  
相與元不隔  
如何故人心  
未炤我胸臆  
徵言極纖芥  
實出左右力  
豈憚決係蹻  
人生且為客

書懷寄杜原父

二首

吾生何為者  
穉年志頗高  
神仙與功名  
壯思躍秋濤  
中

宵豈無寐悲甚幾欲號後來失所養百數患難逃竭力  
奉甘旨出入身甚勞舊書益遺忘九牛存一毛稍後與  
人事忍情如忍刀旦夕自惟念未足非兒曹常欲力道  
德屢失迷所掄區區習蠹簡對案夜焚膏倘然有所得  
中心樂陶陶忽如從古人握手共遊遨攜持亦何事庶  
用娛蓬蒿追思作詠歌示之必賢豪丈夫生世間毋論  
賤與貧夙發多意氣往往惟任真松柏生高岡挺然固  
出羣不為霜雪阨不為風雨春得時可行道節義亦足

伸吾生托下土所識凡幾人窮交獨相慰笑語亦復親

又

遙望山下雲旦起迷羣岫老鶴巢其中縹緲標未搆長  
鳴對秋月鳴罷復俛味散入墟落間聞者莫能究顧惟  
雲外客娛心飲醇酎於此何如哉吾亦有所邁往來常  
泛舟沂流浙江上是時秋風高濤水日夕壯瞬息踰百  
里猛捷莫可狀倚船縱觀久力可騎鯨況顧謂吾友言  
為樂頗豪放斟酌尊中酒懷抱益虛曠常從山中遊實



愛巖谷幽長松蔭泉水四時清如秋佇立輒良久忽欲  
忘其儔吾聞古來人山居多名流此語或可信市朝安  
得留

黃天祥衍三天數求詩

嘗論術數書其變難盡紀為之非賢聖亦多有妙理造  
端無大異據六甲五子分門復析類包括備終始黃生  
衍三天有名聞遠邇蔓延善推測布算加積累吾行徧  
天下所見亦多矣如生豈易得詣實不虛美往來江海

上宿留隨所止省識凡幾人孰為豪傑士歲月瞥眼過  
春花既紛萎蕭條臥旅邸風雨響窗紙勸生遊京師北  
走五千里貴人多問命禍福常自擬兢兢恐跼墜有甚  
履淵水為言徵無咎抵掌必歡喜徵名何足取奮步從  
此起

題史仲憲重修三皇廟

史君宰宜黃政績頗殊異廉不至苟取明不可壅蔽有  
詔行括田使者自臨視限期已促迫責在州縣吏乘時

自培尅上下受其弊君不憚勞苦日夜親算計頃畝無  
增損成書極根柢隣壤大盜起相約不犯界三皇大聖  
人典祀承國制捐金修廟學首政繫瞻視事事有條理  
後來藐難繼集賢秉直筆稱述傳後世當令處風憲擇  
才頗詳諦一朝任擊搏風采必嚴厲英主方在上明見  
萬里外鄙詩或流聞亦可當獻替

贈無極進上人

進公宗門秀高標如長松霜雪亦摧折夭矯化為龍燕

坐大道場五戒為垣墉魔賊悉散走不復事戰攻禪居  
閔青峭窗戶加雲封長日語聲絕風動欄牙鐘

贈執中允上人

南山多白雲澶漫塞崖谷中有龐良叟寂寞卧林屋前  
門樹高松後戶植幽竹孤風相纏繞波濤驚蕩沃梵文  
五千卷誦說盡精熟時時發清唱鏗鏘擊金玉伊余走  
海內一見輒嘆服願言從之遊淡泊心自足

靈龜篇為陳渭叟作馬尊師所画芝龜也

蒼龜生中山深阻絕中道不飲亦不食靈和中自抱嫗  
休凝神液巖上產芝草支干集五采相射顏色好彼遊  
江海上作計苦不早一罹豫且罔性命莫能保歸遺宋  
元君天意資探討築宮修祠祭相承以為寶神者固如  
斯遺骨易枯槁古聞蒙莊氏苦語欲相曉持為衛生經  
千載長不老

楊仲弘集卷一

欽定四庫全書

楊仲弘集卷二

元 楊載 撰

送凌吉叟

大江風雨暗此日送行舟會合能無間攜離祇自愁棄  
繻才足恃題柱志初酬請看秋鴻舉冥冥獨未休

又

末俗唯無侶吾儒氣亦卑相從謀飲食那復敬師資衆  
已欺王式吾猶信不疑可憐如鷓鴣雀擾擾在藩籬

初陽臺望月

彩雲相冪歷華露共嬋娟在水渾疑墮當空孰使懸潛  
虬精魄動宿鶴羽毛鮮寂寂丹臺夜相從訝得仙

次韶卿壬寅元日又三日聞遊人頗盛之作韻

堂堂宵雨過栗栗曉寒仍獻歲人同得東郊事復興杜  
門疑我拙有句愛君能且驗臨堦草從今日漸增

寄劉師魯

好在劉公子遨遊興若何江湖勞悵望歲月劇奔波迹



寄天涯遠詩傳海內多前賢題詠處一一為經過

又

想君遊宦處正值洞庭湖落日波濤壯晴天島嶼孤舟  
航通漢沔風物覽衡巫天下文章敝非君孰起予

龍井

元造生羣物唯龍德最靈作霖蘇亢旱取水竭滄溟變  
化無留迹蜿蜒善養形壯哉吾羨汝一躍上青冥

贈吾子行

春雨連城潤春雲映戶多長衢方淖淖小水亦風波慎  
獨能如此思君可若何便當乘興去著屐一相過

東陽十題

焦桐

只作全生計唯存半死心芻蕘猶不置斤斧重相尋遂  
使焦焦釜誰為愛古琴有材不足恃愁絕念知音

蠹簡

往古韋編在何年始汗青蠹蟲深卜宅科斗少成形泯

滅阡秦火搜羅出漢廷斯文未喪不敢望全經

破硯

彼美端溪石家藏歲月多廉隅皆破缺筋力盡研磨玉  
亦堅而已星如粲者何向來曾自詭持用掇高科

殘畫

斷裂無邊幅華堂棄置餘蒼松深踞地白鶴上凌虛風  
格猶森若丹青總翳如苦心絕人事誰見用功初

舊劍

匣裏雌雄劍通神世所聞潛精依厚地吐氣切高雲亦有蛟龍害寧無星斗文不逢雷煥識埋沒復何云

塵鏡

收藏無寶匣歎息網絲懸孰使明為暗如觀醜勝妍玉臺終寂寂金鵲尚翩翩政訝開元日虛將盛事傳

廢檠

二尺書檠在如今久棄捐魚膏雖有焰蠹簡獨無緣墻下偕遺礫窗間帶舊烟却觀提挈處辛苦悔當年

敗表

寂寞牛衣子能無敝  
緼袍塵埃須浣濯  
蟣蝨費爬搔  
意味存雞肋  
寒涼視馬毛  
千金既銷鑠  
猶聽朔風號

斷碑

摩挲不成讀上有  
蘇斑斑字畫鍾王輩  
文章漢魏間  
龜趺凋鼎鬲  
螭首落孱顏  
渤海神明遠  
今同磴石頑

卧鐘

漢殿經焚後  
喑然卧草中  
雕殘牙板廢  
鏽澁土花蒙  
追

蠡難陳力華鯨不奏功待賢初設簾想見古人風

送屠存博

君往金陵郡於予亦有聞海環平野盡山出大江分未  
召元司馬誰憐鄭廣文自今師道立章薦必紛紛

又

江左知名士唯君德最淳明經初試吏食祿可榮親矯  
矯能違世棲棲直為貧朝廷求俊乂未易捨斯人

渡江寄俞仲連

舟濟大江濱中流日欲曛  
鹵翻沙際雪潮落渡頭雲  
鯨躍常知候鴻飛不亂羣  
頗思論勝槩把酒莫如君

奉題伯父雙峰樵隱

山出雙峰秀溪流一派清  
土風存禮讓人事省將迎  
路逐高低過田隨早晚耕  
家林有如此南望每關情

又

童稚離桑梓猶能憶故山  
雲峰來白腳蘚石露蒼顏  
挿架詩書富應門禮義閒  
綠林遺我恨回首淚闌珊

又

石樹盤根瘦沙溪激浪清竹間看犢卧木末見人行  
檣事常分力樵歌輒和聲從來攜杖處不礙白雲生

又

山曲兩三家相過路不賒對門開竹逕臨水種梅花  
酒熟留人醉詩成任客誇時時談舊事相看鬢垂華

又

草滿三春綠山留萬古青呼兒欣解意應俗憚勞形  
採



菌敲寒木收魚炁夜汀祇應老崖谷束帶尚論經

贈方韶父處士

蜀郡蘇明允襄陽孟浩然成名兼二子得句詫羣賢口  
絕人間事身如物外仙卓然能有此未信獨無傳

又

古賢皆眇邈不意見斯人得趣時時好吟詩句句新  
拏舟來訪友覽勝輒經旬別業稠山下歸歟願比隣

和孟東野題崑山寺

蘭若負崑岡鑿崖安佛牀梯雲石磴滑入厨泉水香旦  
寒鳥相聚月黑龍放光舟行苦局促幸憩殊勝場

送方韶父先輩遊五湖

蕭蕭垂素髮渺渺汎滄波過眼江山好離家日月多詩  
名終不朽世事復如何一往五湖上蒼茫問釣簑

和張仲實之吳興舟行雜詠

水程通百里雲樹隔千層鶴髮歡相見龍門羨獨登文  
辭無乃壯柝杓尚能勝仰止情何極吾為附驥蠅

又

風流須我輩邂逅及斯時  
道術懷經濟文章出笑嘻  
由來天下士絕異里中兒  
它日金閨彥娟娟想翠眉

楊仲弘集卷二

欽定四庫全書

楊仲弘集卷三

元 楊載 撰

寄題羅氏別業 二首

溪行如百里為地已幽深  
石轉黃金塢山抽碧玉簪  
盃觴酬日月弦誦起雲林  
樂事無終極誰能得此心

又

門前臨白逕長日少人行  
野樹重重暗溪流脉脉清  
山光元不斷雲氣自相縈  
已似龐公隱何時重入城

江行次韻

六首

潮頭終歲白沙腹有時矚利涉他州  
旆終更古戍戈天  
依臨海樹風作滿江波亦有投竿意  
還聽孺子歌

又

舊事如遺迹新愁轉泥人晴天宜縱步  
凍草各含春野  
鵲飛林杪沙鷗過水濱江山故如此  
晚望及斯辰

又

藜羹真我食薜荔亦吾衣養性隨時足  
今生徇物非秋

蓬猶未定風樹莫相違謾作烟霞想曾無羽翼飛

又

春花聊共采若木有誰編浩蕩寧無取紛華幸見憐緒  
風吹四裔清露洗重玄萬物皆生意蹉跎畏此年

又

路僻行來好天清望極遐白魚翻急浪黃犢卧晴沙柳  
吐千條葉梅殘幾樹花佳辰從此數歷歷看韶華

又

子胥因諫戮茲事幾經秋顧爾忠難捨于今憤不休天  
風吹地轉海水入江流欲問鴟夷處茫然使我愁

酬子行初秋風颺之作

算夜風濤變崩騰怒不休魚龍皆失穴江海欲同流竝  
岸漂千舍連檣覆萬艘陰陽知有沴惻愴動深憂

送孫大方歸朝元宮

三首

高卧林泉表超然謝世紛空山鳴白雨古石繫蒼雲不  
作夔龍伍甘從鹿豕羣都門遊宦客回首總慙君



又

飛構上凌空依稀想故宮金盤凝曉露玉佩振秋風  
溱那違俗支離更養蒙大還何日就變化入無窮

又

為樓因地勢四面盡青山路落秋城外河流曉樹間  
雁飛雲漠漠龍現雨珊珊建木光華盛何時共折攀

挽饒國吳文康公詩

二首

厚德修天爵崇資拜地官粲然周典禮偉甚漢衣冠共

喜懸金印俄聞蓋玉棺史臣書寵數光照碧巔岏

又

道學絲賢子推恩自聖皇白茅分壤土華袞賜衣裳漫  
注長生錄虛傳卻老方神遊終不返瀛海路茫茫

題張氏順堂

百順名為福紛然會此堂詩書成蘊藉泰稷發馨香夜  
戶鳴琴瑟春筵酌酒漿子孫宜並晉相繼謁明光

題信州先天觀圖

四首

回環因地勢制作本人謀蔽日來龍駕凌空結蜃樓秋  
琴翻浩蕩夜磬答深幽願受長生訣他年幸一遊

又

高林褰翠氣虛谷散虹光道士多騎虎仙人自牧羊澗  
泉通地遠山嶺際天長戴子文為記流傳示不忘

又

四圍山不斷狀若碧芙蓉谷遠含風細崖深下露濃茂  
林藏虎豹隱洞伏蛟龍恍惚神人降浮空羽蓋重

又

鬼神相與處燒藥易成功雲霧生牀下雷霆起室中養  
身唯淡泊遊世等虛空高舉寧無日飄然獨馭風

次引浚儀公題蘭竹卷子韻

樹蕙連叢竹祗應族類同相依巖石畔併入畫圖中勁  
葉凝清露危梢倚碧空諒非高世士此意固難通

贈程景純二首

南遊觀楚越北度覽幽燕羈旅新愁換英豪往事傳塵

沙迷遠驛風雨暗長川好醉新豐酒清朝正選賢

又

論士無他術先觀氣盛衰澗松多勁節瓊樹有高枝圖  
籍曾無覽弓旌詎久遺似君宜努力慎莫負明時

思菴

閔氏青山下遺封見若堂  
蓼莪恩未泯拱木恨難忘  
德業銘金石詩書塞棟梁  
子孫修學術奕世有輝光

赤壁圖

寂寂長江夜同人共泛舟清尊方淡蕩孤棹且夷猶望  
遠幽禽度歌長獨竄抽千年遺跡在不逐水東流

贈昌上人二首

山中明月小壠上白雲多旦食飡松柏秋衣攬薜蘿俗  
人希見問禪老每相過異日高僧傳垂名定不磨

又

未生天地始此理固存存直木何由曲清源不可渾養  
生母過厚守道在彌敦超出塵埃網靳師共與論

送葉彥中之官行臺 二首

范滂將攬轡周景已題輿九扈名兼美三鱣兆豈虛都  
門愁搯袂江徼喜沿書重有斑衣奉南州總不如

又

大府徵才士知君學業優兩京勞侍從十載困淹留白  
雪歌難和青雲志易酬鍾山多勝槩有意與同游

送胡秀才歸新安 二首

明詔方求士知君有俊才未聞遺杞梓何事返蒿萊似

驥寧淹足為龍豈暴腮文章成錦繡他日必重來

又

彼美逢衣子遨遊至上京雲霄方有志塵土已知名塞  
雁驚新恨溪鷗憶舊盟秋風吹易水惆悵復南征

惠崇古木寒鴉

江上秋雲薄寒鴉散亂飛未鳴常競噪向晚復爭歸似  
怯霜威重仍嫌樹影稀老僧修止觀寫物固精微

留別陳益謙



大帆仍馭娑雙棹復夷猶曉岸烟沙濶春江霧雨稠桃  
花隨漲水苧菜逐長流遲子來京國何時賦壯遊

遊陳氏園偕李治中張提舉

曉日從千騎郊原樂事多溪山春與麗烟靄晝相和宿  
蠹藏編冊鳴騶隔薜蘿使君辭滿引起舞亦傚傚

挽艾處士 二首

才行能震美終身作布衣江湖名自遠塵土迹還稀野  
菊秋霜薄岩松夕照微沙鷗盟未改忽忽下漁磯

又

撰文來相府書字出詞垣盛事傳千載幽光發九原父  
賢宜竝著子孝復堪論多少衣冠族無聞愧後昆

顧氏義塾

居鄉為義塾茲事罕前聞外戶來衿佩中堂蓄典墳儒  
宗先麗澤聖德尚彌文吳下多豪族能賢總羨君

挽吳道士

曾為方外士抗迹出塵氛既草歸田賦仍書誓墓文卧

牛空有兆紀鶴竟無聞春草年年合誰憐道士墳

送林季羽入京宿衛

三首

青雲自致身磊落見斯人卷袞辭蒼麓垂纓侍紫宸漏  
殘珠閣曉香暖玉爐春倘厭承明事歸來衣錦新

又

終軍方近幸賈誼最能文獨用奇才進應將美譽聞金  
鞍光照地寶劍氣凌雲來往燕臺下同游必羨君

又

衛郎皆世胄之子更才賢意氣雲霄上榮光日月邊都  
俞聞寶訓出入奉瓊筵立志當弘毅功名不偶然

送徐義父入京 二首

舊富三冬學今為萬里遊風雲丹鳳闕雨雪黑貂裘南  
土名先著東堂選必優相逢多意氣談笑接名流

又

幽燕向日邊裘馬去翩翩磧迥沙如雪河窮浪入天上  
書雙闕下待詔五門前壯節當奇遇無煩媿往賢

贈曇上人 二首

多生為佛子，慧達自童蒙。  
蟬脫凡塵外，龍騰覺海中。  
一真元不染，四大本來空。  
異日叢林下，知師繼杲公。

又

人世百年內，都如過隙塵。  
不開心上眼，苦愛夢中身。  
城市無閑日，江山又晚春。  
相逢言道好，獨覺意相親。

贈胡汲古 二首

先生唯達道久矣，樂山林致聘無雙壁。  
為生過十金身。

閑雲出岫髮短雪盈簪遁世猶吾志同盟欲自今

又

野客何蕭散長年暫出遊風塵唯短褐江海自扁舟有  
迹能來往無心任去留才名今藉甚屈指到枚鄒

送胡汲古之吳中

有客佩蒼精居然得此生山開棲越跡水泝入吳程佚  
老悠悠計傷離戀戀情食菲方未已應不為魚羹

中秋

攬雲憑結構步月上林皋不記金尊竭頻瞻玉宇高神  
清存夜氣天濶數秋毫百尺樓如在何煩卧汝曹

挽曹光益 二首

斯人吾所愛不見已經年頗怪魚書絕俄聞鵬賦傳歸  
魂迷道路遺骨滯山川遠業凋零盡臨風為悵然

又

好學無如子冥冥獨苦心未成梁棟用誰使雪霜侵宿  
草孤春意游雲泊太陰憶渠情不已揮淚在衣襟

贈劉時中二首

騷雅誰能繼居然屬大才銳思羅宇宙逸興走風雷處  
勝輕流俗名高震外臺東郊乘大路翼翼待龍媒

又

吳越千餘里君來按轡遊羣公虞罪戾多士想風流決  
事曾無壅觀民輒有憂若人何可得離別重添愁

送王元禮歸平城二首

燕趙多奇士遺風有固然射鵬猶絕藝屠狗亦名賢形



勢威天下風流號北邊送君歸此地亦欲奮吾鞭

又

牧羊憐馬援投筆困班生侯印終兼綰窮愁實飽更大  
才當用世小挫亦知名快飲桑乾酒能澆氣不平

贈張之翰 二首

外臺收掾屬奮步集亨衢落落蟠英氣飄飄發壯圖威  
風聞郡邑行李涉江湖竝轡逢佳友周游興不孤

又

長才當用世進取或殊途  
劇劇曾揮刃銷奸若燎枯  
交游冠蓋盛出入禮儀都有賴  
寬衰俗餘波及腐儒

送陳君佐入京二首

子欲遊京國程途萬里遙  
束裝辭邑社振旆躡風飈  
學問先餘子飛騰在一朝  
太平知有策必顯聖明朝

又

董子知天道朱雲善易經  
由來登俊乂所以重朝廷  
彼有譏儒服吾無鼓說鈴  
君看鴻鵠舉忽忽至青冥

宿延祥觀有感二首

處世如庸俗胡為淹此留蹉跎悲往日磊落愧前修願  
棄人間事來為物外遊大還如可就猶足訪丹丘

又

瓊館遊仙子超然遠世情言辭多近道豪翰久知名露  
下衣裳溼風來几案清似君居處勝亦足寄吾生

題青田葉叔至野清堂二首

為堂殊顯敞在野興尤濃白水流千折青山繞百重樹

麻行旆旆蒔木倚童童相對漁樵話終朝亦罕逢

又

遠來山異甚龍虎互騫騰溪狹灘聲悍林繁雨氣增  
正須求靜坐何事角多能謁告還鄉里君堂或可升

送張宣撫使嶺南

二首

奉使入蠻烟終軍始妙年抗旌辭朔野擊楫渡湘川  
翠竹侵巖際黃茆盡海邊狼荒非善地為戒莫留連

又

此行行萬里渺渺極朱涯地勢雖懸隔天威可遠加引  
弓飛惡鳥拔劍斬妖蛇遲子歸來日燕南看雪花

送李侍郎使安南

九秋天色晚萬里送君行馬首塞雲起腰間寶劍橫奉  
揚天子命慰答遠人情直渡蠻江水炎氛一日清

喜雪酬康子淵院使

漠漠連天暗霏霏著地輕欲迷鳩鵲觀先入鳳凰城凍  
影篩簾密寒光射隙明詰朝宜表賀來歲卜收成

送吳清叔

驛路程雖遠帆風勢甚適青山隨岸去白水滿江流  
牢落添新恨繁華憶舊遊只今歸去好把釣即槎頭

贈鄭尊師

茫茫雲著地撼撼雨交天篁竹連河上青茅盡海邊  
棲遲聊應化放曠且談玄相對蒲團坐清風為肅然

黃櫟杖為龔聖與作

嗟哉黃櫟杖吾賴汝扶持未免道途苦無如筋力衰散

才唯不用大節固多奇老向江湖上提攜得自隨

次夏仲勉韻

二首

門前無繫馬屋外有鳴蜩迫近衣冠府蕭條翰墨場雨  
淫憂地溼風暴喜天涼推轂無時已令人憶鄭莊

又

不喜為文富長憂得酒慳尊罍堆案上筆硯棄牆間有  
傳追王績無書繼賈山貴人能慢士往見亦胡顏

冬至次張宣撫韻

二首

北去關河遠南歸歲月長屠龍雖有技相馬獨無方雲  
水連天暗霜蕪滿地荒客遊應未已塵土在衣裳

又

瀛海無消息冥冥鳥道長已驚雙鬢短更待兩瞳方落  
日依平嶂洪河入大荒憂來那可得揮淚欲沾裳

送吳清叔歸婺

客遊春向莫無日不思歸雨給桑麻秀山深笋蕨肥薄  
醪能屢醉舊社足相依莫道天邊雁衝衝適禍機



與方韶卿望月

月明胡乃爾秋盛故能然匣鏡無纖翳槃珠有許圓寒  
光搖碧海爽氣挾青天幸遇山頭鶴令人夜不眠

孝思亭詩為王心田作

山嶠靄蒼蒼盤旋衛古藏盎溫通地氣赫奕閔天光神  
化侔飛劍前聞驗若堂子孫修祭祀歲久不能忘

淨香亭

二首

藝竹蒼空古為亭白日幽一麾方出守千戶益封侯外

物從渠屏清樽喜客留楣間標勝語朗詠亦風流

又

翼翼四簷外蕭蕭三逕中珠璣穿夜雨幢燾舞天風擁  
袖生清氣開軒近碧空古人雖不見佳興詎無同

酬吾子行

耿耿思朋舊悠悠涉歲華既依秦大姓方問魯東家雅  
道將誰與新詩敢自誇祇今能會合不憚路途賒

偶作

碧草含秋意黃雲起算容歸鴉昏且噪去雁有無踪盃  
酒因循醉朋人邂逅逢身名猶碌碌正坐日疎慵

送劉明卿歸安東

同郡居相遠逢君豈偶然秋天聯席宴寒夜共衾眠不  
為時名役猶嗟俗事牽語離還悵快後會是何年

和張仲實舟行雜詠

莫作匆匆去相隨稍稍觀遠山多意態急水易波瀾把  
酒悠然樂扁舟得爾難五湖天下景六月氣常寒

題秋江釣月詩卷

泛跡秋江上而今不計年  
垂綸牽細浪欹帽破長烟  
已類玄真子兼疑孟浩然  
後來名未泯題品有高賢

楊仲弘集卷三

欽定四庫全書

楊仲弘集卷四

元 楊載 撰

壽姚承旨

上帝黃金闕仙人白玉堂  
皇猷資黼黻大筆主文章  
間氣生奇偉休期際吉康  
四朝承寵渥多士仰輝光  
盡發琅函祕重繙石室藏  
成書侔二典有道述三皇  
碩望高天下榮光近日傍  
謀謨須稷契羽翼藉園黃  
上殿扶鳩杖開筵接蟻觴  
九重師道德千載合明良  
共說綸如綍

能催繡作裳人思興禮樂國待理陰陽舊族名先著高  
門慶甚長賜書踰萬卷納笏過三牀轉覺勛庸盛還欣  
體力强朱顏朝映日素髮曉欺霜已注長生錄曾傳却  
老方宜齊周李耳遠邁漢張蒼松栢深逾秀芝蘭久益  
芳願公多壽祉仍見子孫昌

贈周景遠學士

朔易回元氣人才起俊流聲華當翰苑文采冠中州振  
佩趨臺閣抽毫侍冕旒人傳鸚鵡賦家有鸛鷖裘式觀

黷宮立共惟祀典修一朝虞或缺六器俾傍求俎豆俄  
成列蘋蘩遂可羞中朝方有道下士實同休已及歸鴻  
候姑為食蟹謀朋簪多繾綣使節少淹留曉日花間酒  
春風柳下舟篇章微品藻山水媿清幽鄭璞曾先愿隋  
珠不暗投考槃雖自引閱觀亦吾憂簡冊銷長日蓬蒿  
憚凜秋論高非縱誕興遠託賡酬尚憶駒千里胡能貉  
一丘何當把君袂相逐馭風遊

壽杜尊師

淡蕩風雲氣沈雄虎豹姿繇來天下士絕異里中兒苦  
縣常栽李商山舊采芝不當卿相位猶可帝王師始有  
巾車獲俄蒙仄席知賢才方竝用讒說遽相欺豸角將  
魏冠龍鱗敢逆批變通俱合道舒卷各乘時築室煙霞  
祕還丹日月遲願公長住世須作後天期

次韻曹士開毗陵喜雨

下土方淫澇高田獨旱乾木形憂隕命藿肉愧為官索  
寞雲容合蕭條夜色闌精誠天已感祠禱力初殫迥野



霑新潤曾檐下急湍槁苗還疑疑大豆且團團達宦俱  
相似疲民乞少安佳章宜刻石留示後人看

春雪次陳元之韻

寒氣何悽慘春空正杳冥東皇收索籥北帝駕軫混  
沌包三極繽紛走百靈散殊分的皪擊玉碎瓏玲始試  
朝藏日俄疑晝隕星危橋無客渡曠野少人經百沸疑  
奔瀨孤撐沒峻岭林荒顛凍崖滑墮哀挺袞袞隨風  
舞颼颼襍雨零遺蹤初得兔匿種詎憂螟眊昧傾農室

歌謠徹帝庭陽春將布德品類各成形捉筆題新句持  
盃酌舊醺今朝須痛飲醉卧不須醒

送張仲實之宜興

南渡邦初造西山將獨賢立功何赫赫流慶尚綿綿報  
國橫戈數登壇授鉞專風雲方際會江海固周旋控險  
千鈞弩臨危七寶鞭忠誠深足仗智勇實兼全自返高  
橋後端持宥府權兵威終抗敵人力可回天甲第無踰  
者諸孫固穎然初生同燕領有美自嬋娟善學聞當代

能詩起妙年衛公猶故物鄭老竟寒壇矯矯青雲器冷  
泠白雪弦同遊雖未達自覲已無前政事兼留意時髦  
孰比肩知機無轉石縱辨若奔川特達羣公薦酸寒衆  
目憐姑為文學掾會覓孝廉船必見公侯復無論雨露  
偏秋風鵬鷃健萬里正翩翩

送丘子正之海鹽州教授

有美區中彥由來志不羣舟航了吳越裘馬向燕雲才  
思庾開府風流王右軍得時宜玉筍稽古賸香芸果拔

英毛穎遙收翰墨勛諸公布官達半世有辛勤奔走空  
皮骨躋攀不寸分夏侯何地芥鄧匠實風斤嗟我慚鷗  
鷺棲山似鹿麕偶來詢故老因得友多聞湖舫曾秋雨  
河橋幾夕曛過從方不散慘別亦奚云俎豆班侯泮鹽  
絺薄海濱未論虞廩米聊樂魯宮芹此日顏應抗之人  
德已薰化爐新鼓樂學殖重耜耘行矣穿黃落歸歟守  
白紛贈言將底事努力在斯文

贈班彥功

名書稱晉代盛事起江東內翰鍾奇氣深情縱古風  
振衣皆弟子入室自豪雄欲立千金價寧論百日功  
奏名黃閣老承詔大明宮遺教規王氏陰符易褚公  
杯沾銀鑿落佩遙玉玲瓏文學談經早聲華脫穎同  
麥光人共賞棘刺巧無窮願積臨池趣流傳史冊中

士開燕岳氏溪堂有溪山新月上江海故人同之  
句邀予及張仲實曹克明同足成之

置酒秋風裏凭闌野色中溪山新月上江海故人同縱

浪情何極留連燕未終三鱣來上客五馬會羣公積水  
輸清氣微霞街近空將昏林尚白及早稻先紅極論追  
遐古深情念困窮尚觀儀秩秩未遂樂融融才著當朝  
傑文誇命世雄數君今日選宜爾集南宮

次韻黃子久喜晴三十韻呈汪知府

霞彩晨張錦蟾光夕挂鉤陰霾雖盡解淫潦豈全收  
寢動遨遊興還聞倡和謳容容追舊賞歷歷破新愁  
騎氣城邊縱龍光海際浮艷粧來士女盛服擬王侯  
在藻羣

魚躍依林白鳥啾河流交不斷山勢轉相繆物理歸含  
毓人情釋怨尤娛從老稚燕樂逐朋儔幄帟分郊次  
檐帷擁道周聯翩馳画舫截業累朱樓貿易通遐壤繁  
華壓大州聚廬千井富接棟萬家稠已戒增周口仍催  
洩下流嘉蔬連隙地宿麥徧高丘曹事虞多廢胥徒戢  
過求醲恩方竝育和氣與同遊期會朝先往追隨暮不  
休露華開的的風葉振颼颼拾芥非無日登禾即有秋  
朝家期少試隣郡固難侔共美光華著還矜德業修在

廷爭進薦當宁免垂憂玉漏傳金角金尊出殿頭秉心  
存正道造膝待嘉謀履直恒如矢防偏或類舟第誇繙  
竹簡不省計牙籌善對慙鳴鶴能歌愧飲牛過情蒙許  
與彌月為淹留

再用韻贈黃子久

自惟明似鏡何用曲如鉤未獲唐臣薦徒遭漢吏收悠  
然安性命復此縱歌謳石父能無辱虞卿即有愁歸田  
終寂寂行世且浮浮不假儕羣彥真堪客五侯高人求



替洽末俗避喧啾藜杖常他適繩樞每自繆與人殊用  
舍在己寡愆尤濟濟違班列俛俛遠匹儔能詩齊杜甫  
分道偏莊周達飲千鍾酒高登百尺樓艱危仍蜀道留  
滯復荊州鶴度烟霄濶龍吟霧雨稠東行觀海島西逝  
涉江流自擬需于血何期渙有丘古書嘗歷覽大藥豈  
難求撫事吟梁父馳田賦遠遊堂名希莫莫亭扁效休  
休檻日迎東濟窗風背北颺鳴琴消永晝吹律效清秋  
雅俗居然別仙凡迥不侔多聞踰束皙善對邁楊修進

有匡時略寧無切己憂塵埃深滅跡霜雪暗盈頭始見  
神龜夢終營狡兔謀雪埋東郭履月滿太湖舟急景誰  
推轂流年孰唱籌凌波乘赤鯉望氣候青牛好結飛霞  
佩胡為淹此留

寄王繼學二十韻

聖主敷皇極元臣建上台虛心求俊乂削迹去奸回拜  
命超凡品知君秉大材淳風隨日播公道應時開負鼎  
資烹飪撻刀貴刺裁銛鋒行肯綮異味合鹽梅廟議常

參決朝班復共陪艱難須飲助豁達遠嫌猜遺佚聞風  
起英豪接踵來經綸非董賈辭藻亦鄒枚在野思羅致  
盈庭想轂推既將龍作友惡假鳩為媒走也今留此公  
乎可念哉執竿猶海上扶耒即巖隈自守幽人意寧虞  
俗子咤舊遊辭玉府故事憶金臺落魄江湖阻蒼茫歲  
月催丹心徒耿介素髮已毵毵勿謂交如水能忘恥及  
壘飛黃當駕馭猶足異駑駘

送完者都同知

來游天子學藉甚有聲華論事依三策藏書至五車姓  
名題雁塔譜牒記龍沙自可編青竹兼宜綰白麻文工  
金有價貌美玉無瑕興盡方豪飲篇終不浪誇豈惟吟  
芍藥曾是賦蒹葭事莫分難易人須辨正邪月中初折  
桂天上始乘槎勿待秋風起宮門聽鼓撾

贈郭集賢

衣冠趨近地藻翰集羣賢給事黃門裏抽毫黼座前佩  
龜金作紐賜馬玉為鞭御酒傾壺滿宮花插帽偏清光

依日月逸思繞風烟記憶踰三篋吟哦過百篇自惟叨  
侍從不敢廢周旋秋著隨車獵寒當襍被眠蘇環才既  
敏陸贄寵尤專自爾紆皇眷於馬理化弦詞臣方進用  
才大畢騰騫可念如揚子蕭蕭獨草玄

悠然閣

高閣凭虛起登臨興甚長江流春渺渺樹色曉蒼蒼原  
隰魚鱗布峰巒鳥翼張雲來兼北極雨過及南荒地大  
遺民富時清致理康南山常在望懷古意難忘

寄周御史二十韻

同游河北後共抵浙西初獨倚知心舊翻成會面疎三  
年仍契濶萬里更吹噓小子無奇氣先生有過譽見稱  
司馬賦求授夏侯書倉卒排歸計淹留著寓居已非興  
俊逸猶異主癰疽名士多親我諸公或請予駕言將采  
芑即事欲連茹顧爾傷流矢居然恨倚閭驚心聞杜宇  
過眼易蟾蜍忽召抽金匱俄徵論石渠文章殊賈馬謀  
略匪嚴徐薄技終難效窮愁只自如尚矜存弊履不肯

曳長裾與作棲梁燕寧為呼轍魚儀形長日想懷抱幾  
時攄奏疏聞當宁抽毫待直爐烏臺弦既改鼇禁席仍  
虛馬首何繇見分光興有餘

送董與可為句容縣主簿

主簿非高士通才或暫為催科虞慘急勾校慮稽遲慎  
察文無害詳觀獄有疑溫純規白璧正直視朱絲要使  
聲名著何嫌品秩卑烏臺懸日月舉辟實無私

送朱復之為邵武教授

放浪來京國於今復幾年山川多歷覽日月屢推遷異俗疑烏帽窮途信馬鞭達官空有榻遊士固無羶始聽除書下俄聞抗旆還南州分教地成法紹前賢

趙彥祥母慶八十

從親年八十萬里自西來氏族稱三蜀光華照二臺柰繁愁夜雨筍長望春雷綺食和金鼎香醪進玉盃鳳毛方煒燁鶴髮正毵毹試使蟠桃熟從今更幾回

雲山圖為茅山劉宗師作



長江千萬里奔浪薄高雲龍現誰能覩猿啼不可聞迂  
迴因地勢昭晰應天文劒氣秋如洗珠光夜欲焚連峰  
俄筍迸斷岸復瓜分句曲臨東極巖頭有隱君

題康里氏家譜

國受輿圖廣家傳譜牒詳馳聲繇雁塞拓跡至狼荒轉  
戰踰千里來降盡一方奮戈回白日列戟耀清霜破竹  
收城邑分茅賜土疆弟兄皆勁悍父祖各雄彊相印仍  
兼綰兵符更迭藏排衙開萬弩納笏過三床已及書宗

祐還宜紀太常後人能繼紹千載有輝光

題王叅政積翁別故人詩卷後

聖主膺新命明公遇盛時混同開宇縣困厄守城池寇盜思攘斂黔黎賴寵綏合珪承燕享前席備詢咨築室求梁棟徂堂薦鼎鼐用兵陳廟算養士作邦基已草歸田賦仍題伐木詩此生終契濶吾道豈磷緇矯矯游龍字綿綿吐鳳辭錦囊加什襲細覽想形儀

贈魏虛舟少府

西蜀文章伯東吳閥閱家族傳貞觀舊躅繼信陵遐雅  
度人難測高名衆共誇為楨材不小韞櫝玉無瑕鳴鳳  
占諧吉乘龍偶契嘉三牀邀納笏萬弩護排衙世賞官  
仍及朝叅寵復加天顏垂眷顧地肺侈光華緩步方鳴  
玉高情欲泛槎翻然歸翠麓姑爾奉黃麻彭澤還栽柳  
河陽不種花投閒銷日月訪古略烟霞臘蟻常開宴春  
魚每看義興來恒放逸賓從任喧譁閤靜褰珠箔窗虛  
闕綠紗琴彈多古雅詩就輒妍姱願作梁間燕徒慚井

底蛙執鞭曾莫効抱瑟敢長嗟戀戀情終在悠悠道苦  
賒春風吹去旆翹首又天涯

贈劉平叔郎中

肇自三苗氏淫為五虐刑商周終至治禮樂固常經赦  
過存三宥原情用八聽未能還畫象猶貴去殘形末俗  
仍澆薄生民曷救寧謂宜沾雨露抑使震雷霆皞皞惟  
毋擾元元庶有靈林殘求虎豹穀害去蝗螟此意雖忠  
厚斯言若宵冥君乎吾有望當使在朝廷

送丘子正之海鹽

珠生滄海底玉韞碧山中夜氣交明月陽精現白虹有  
賢兼重價當代振英風好學由天性能書至國工知名  
傳冀北作賦擬河東始欲徵揚子旋聞薦褚公陰符難  
獨美遺教實爭雄絕藝雖宜進奇才自不同交游傾上  
國掄選屬南宮鄧禹官初試匡衡對漫通海邦終寂寞  
學館尚穹崇已注千人錄當成五典功星辰皆在水渤  
解信浮空把酒歡何限乘槎興不窮文章趨浩瀚物態

入牢籠子必登芸閣吾方守桂叢索居彌寡陋荒業孰  
磨礱弗獲披雲霧惟思對華嵩知音期郭泰流俗易王  
充江海從茲逝飄飄任短蓬

贈虞彥高

吳越知名士風流得此人結交何待久晤語即相親丹  
穴生儀鳳滄波豈縱麟飛鳴常見瑞變化不無神家世  
皆為善文儒謹飭身不將紉袴累自著綵衣新力學追  
高古修辭絕等倫汪茫涵巨海要眇動纖塵鐘簴聲音

大猷經節奏均詎誇傳里巷可使杼絲綸藉藉聞當代  
駸駸集要津省闈曾奉檄學館已垂紳滋味嘗郊鼎光  
華薦席珍南宮延國子西掖選詞臣慷慨升車日遲回  
執袂辰論心情已至抵掌氣彌振虞誦才方壯湯休學  
最醇相期終晚歲無取艷芳春抱獨知何向為朋喜有  
因從君鳴一世流詠被無垠

鄭中丞母大夫人壽八十

端公居重位壽母在高堂天意何相厚人倫實有光

冠方俊偉鶴髮尚康彊內翰為封誥同僚舉慶觴欣欣  
承玉饌赫赫帶金章獻笑慈親側繩愆聖主傍中天懸  
日月下土凜風霜可謂全忠孝都緣積義方孟軻難獨  
美湛氏竟齊芳頌得吾無媿名宜百世揚

送朱仲山歲貢入京

昭代陶淳化多方出異材鳴岐聞鳳鳥清道服龍媒養  
素稠山僻觀奇載籍該為珍如寶璧奮蹟起蒿萊未展  
垂綸趣初承勸駕催羔羊填委巷駟馬踐輕埃戰藝鋒



無敵搜賢網正恢上書追偃樂作賦竝鄒枚奮發真從此遊觀亦壯哉雲霄千萬里瞻望重徘徊

招真觀圖

欲學無為道來居小有天精神消物怪采色變風烟恬澹知天德虛無象帝先高風何特達古跡尚流傳地涉鴻荒表山開混沌前谷幽疑鬼聚峰巧類人仝疊起三重閣分流百道泉岩穿留虎跡石冷逗蛟涎放浪曾無日遨遊未有年古經披覽罷毛骨為醒然

喜晴得揚字呈汪知府

霏霏塞宿靄煜煜射初陽出谷鶯聲滑摩空鶴勢張鼓  
輦爭奮發帆慢各飛揚不畏塗泥滑寧憂積潦妨農夫  
分舊種紅女覓柔桑為有豐年慶陳陳滿太倉

寄沈少微金華山隱居

巖前通細路嶺外接危峰梯磴踰千級烟霞過萬重綠  
崖收異筍步壑數長松隔屋號朱虎當窓現黑龍蘅蘭  
爭酷烈桃李角鮮穠隱士多相過仙人庶可逢第能安

性命何患改顏容煉鼎丹砂熟傾壺白酒醲微茫追絕  
響瀟灑振孤踪鄉里宜同好它年必子從

挽徐處士

此日新安郡名家復數誰危科雖屢掇舊業詎多遺孝  
友全高行溫恭集令儀花殘青歲晚木落紫山悲結蟻  
容兼盛銜鱣譽更垂白雲埋骨處揮涕想連瀉

送侯尊師歸蜀

北上關河遠南歸歲月賒飄飄攜短劒杳杳泛靈槎別

岸秋濤掩前山曉霧遮欲攀青桂樹先採白蘋花大道  
元無極浮生即有涯舉杯吞夜月引袖拂晨霞獨跨沖  
天鶴能追赴壑蛇祇因投老去長日煉丹砂

春晚喜晴

積雨俄經月新晴始見春蒼苔侵別墅綠水過比隣性  
僻居宜遠身閒景易親無詩排世累有酒縱天真循圃  
花粘履僊闌柳拂中歌呼從稚子談笑或嘉賓漸喜漁  
樵狎仍欣鳥雀馴幽情延薄莫浩思集清晨養拙元非

病為文敢自珍杜門緣底事作計懶隨人

楊仲弘集卷四